

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**RJEŠENJE**  
**o ocjeni koncentracije između privrednih subjekta**  
**MG Mind d.o.o. Mrkonjić Grad i Tržnica a.d. Banja Luka**

**Sarajevo**  
**decembar, 2011. godine**



**Broj: 01-26-1-014-12-II/11**  
**Sarajevo, 08.12.2011. godine**

Na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16. i 18. Zakona o konkurenciji ("Službeni glasnik BiH", br. 48/05, 76/07 i 80/09), a rješavajući po Zaključku o pokretanju postupka po službenoj dužnosti za ocjenu koncentracije broj: 01-26-1-014-1-II/11 od 29.9.2011. godine između privrednih subjekta MG Mind d.o.o. Mrkonjić Grad, Podbrdo bb, Mrkonjić Grad, Bosna i Hercegovina i Tržnica a.d. Banja Luka, Ive Lole Ribara 4, Banja Luka, Bosna i Hercegovina, Konkurencijsko vijeće na 23. (dvadesettrećoj) sjednici održanoj dana 8. decembra 2011. godine, donijelo je

### **R J E Š E N J E**

1. Ocjenjuje se dopuštenom koncentracija na tržištu pružanja usluga tržnica i pijaca na veliko i malo na području Republike Srpske, nastala kupovinom većine dionica od strane privrednog subjekta MG Mind d.o.o. Mrkonjić Grad, Podbrdo bb, 70260 Mrkonjić Grad u privrednom subjektu Tržnica a.d Banja Luka, Ive Lole Ribara 4, 78000 Banja Luka.
2. Utvrđuje se da privredni subjekt MG Mind.o.o. Mrkonjić Grad, Podbrdo bb, 70260 Mrkonjić Grad nije podnio Prijavu koncentracije u zakonom predviđenom roku, u smislu člana 16. stav (1) Zakona o konkurenciji, i da je proveo koncentraciju bez rješenja Konkurencijskog vijeća, u smislu člana 18. stav (9) istog Zakona.
3. Zbog kršenja Zakona o konkurenciji navedenih u stavu 2. ovog Rješenja izriče se novčana kazna privrednom subjektu MG Mind d.o.o. Mrkonjić Grad, Podbrdo bb, 70260 Mrkonjić Grad u iznosu od 40.000,00 KM, koju je dužan platiti u roku od 8 dana od dana prijema ovog Rješenja.

U slučaju da se izrečena novčana kazna ne uplati u navedenom roku ista će se naplatiti prisilnim putem, uz obračunavanje zatezne kamate za vrijeme prekoračenja roka, prema važećim propisima Bosne i Hercegovine.

4. Ovo Rješenje se upisuje u Registar koncentracija.
5. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Slijedom informacija objavljenih u dnevnim novinama "Nezavisne novine", dana 11.3.2011. godine, Konkurencijsko vijeće je provelo preliminarne aktivnosti na prikupljanju podataka u vezi moguće koncentracije između privrednog subjekta MG Mind d.o.o. Mrkonjić Grad, Podbrdo bb, Mrkonjić Grad, Bosna i Hercegovina (u daljem tekstu: „MG Mind“) i privrednog subjekta Tržnica a.d. Banja Luka, Ive Lole Ribara 4, Banja Luka, Bosna i Hercegovina (u daljem tekstu: „Tržnica“).

Prema objavljenim informacija privredni subjekt MG Mind je dana 9.3.2011. godine na Banjalučkoj berzi otkupio više od 50% dionica privrednog subjekta Tržnica čime je postao većinski vlasnik navedenog privrednog subjekta posjedujući 75,345 % dionica uzimajući u obzir da je do tada privredni subjekt MG Mind već bio vlasnik 24,919 % dionica privrednog subjekta Tržnica.

Ostatak dionica od 24,655% akcija se nalazio pretežno u vlasništvu Penzionog rezervnog fonda a.d. Banja Luka, Fonda za restituciju RS a.d. Banja Luka i određenih fizičkih lica.

Radi utvrđivanja obaveze podnošenja prijave koncentracije, u skladu sa članom 14. Zakona o konkurenciji (u daljem tekstu: Zakon), Konkurencijsko vijeće je od Agencije za posredničke, informatičke i finansijske usluge Banja Luka, aktom broj: 01-26-10-93-I/11 od 17.3.2011. godine zatražilo dostavu godišnjeg finansijskog izvještaja privrednog subjekta MG Mind za 2010. godinu, a dana 26.4.2011. godine aktom broj: 01-26-10-127-1-I/11 godine i godišnji finansijski izvještaj za privredni subjekat Trznica.

Konkurencijsko vijeće analizom prikupljenih podataka ocijenilo je da postoji osnovana sumnja da koncentracija između privrednih subjekata MG Mind i Trznica nije prijavljena, odnosno provedena u skladu sa odredbama Zakona, te je donijelo Zaključak o pokretanju postupka po službenoj dužnosti ocjene predmetne koncentracije broj: 01-26-1-014-1-II/11 dana 29.9.2011. godine (u daljem tekstu: Zaključak).

Konkurencijsko vijeće je privrednom subjektu MG Mind dostavilo Zaključak na odgovor aktom broj: 01-26-1-014-5-II/11 dana 29.9.2011. godine, u skladu sa članom 33. Zakona te u smislu člana 30. Zakona i čl. 9., 10. i 11. Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, broj 34/10) i zatražilo dostavu relevantne dokumentacije i informacija.

Konkurencijsko vijeće je dana 20.10.2011. godine pod brojem: 01-26-1-014-6-II/11 zaprimilo podnesak privrednog subjekta MG Mind putem kojeg je isti, u smislu člana 33. stav (3) Zakona, zatražio produženje roka za dostavu odgovora i dokumentacije nakon kojeg je Konkurencijsko vijeće dana 26.10.2011. godine aktom broj: 01-26-1-014-7-II/11 privrednom subjektu MG Mind odobrilo produženje roka za dostavu odgovora i dokumentacije za dodatnih 10 dana.

U ostavljenom roku privredni subjekt MG Mind je dostavio svoj odgovor i djelimično tražene informacije i podatke podneskom broj: 01-26-1-014-8-II/11 dana 2.11.2011. godine i podneskom broj: 01-26-1-014-9-II/11 dana 10.11. 2011. godine, nakon čega je Konkurencijsko vijeće ponovo zatražilo dostavu dokumentacije i podataka aktom broj: 01-26-1-014-10-II/11 dana 11.11.2011. godine. Privredni subjekt MG Mind je traženu dopunu dostavio podneskom broj: 01-26-1-014-11-II/11 dana 17.11. 2011. godine

U odgovoru na Zaključak navodi se, između ostalog, da privredni subjekt MG Mind smatra da su učesnici koncentracije u ukupno ostvarenim godišnjim prihodima u 2010. godini imali relativno male udjele prihoda koje su ostvarili prodajom roba iz asortimana opreme za domaćinstvo i bijele tehnike indirektno navodeći isto kao razlog nepodnošenja prijave koncentracije Konkurencijskom vijeću.

Konkurencijsko vijeće je nakon analize svih prikupljenih podataka u postupku ocjene koncentracije utvrdilo slijedeće činjenice:

### **1. Učesnici koncentracije**

Učesnici koncentracije su privredni subjekti MG Mind d.o.o. Mrkonjić Grad, Podbrdo bb, Mrkonjić Grad, Bosna i Hercegovina i Trznica a.d. Banja Luka, Ive Lole Ribara 4, Banja Luka, Bosna i Hercegovina.

## **1.1. Privredni subjekt MG Mind**

Privredni subjekt MG Mind d.o.o. Mrkonjić Grad, Podbrdo bb, Mrkonjić Grad upisan je u sudski registar Okružnog privrednog suda u Banjoj Luci pod matičnim brojem: 1-11812-00, sa upisanim i uplaćenim kapitalom od 687.736,00 KM.

Osnivač i vlasnik privrednog subjekta MG Mind je fizičko lice Mladen Milanović, Jovana Cvijića bb, Mrkonjić Grad koji je također vlasnik 64,88% dionica privrednog subjekta Mrkonjić putevi a.d. Mrkonjić Grad i 100% dionica privrednog subjekta Merkur a.d. Banja Luka.

Sjedište privrednog subjekta MG Mind je u Mrkonjić Gradu, a svoje maloprodajne objekte posjeduje u Banjoj Luci, Ribniku, Bijeljini, Brčko Distriktu, Prnjavoru i Doboju. Trenutno zapošljava oko 170 radnika.

Pretežne registrovane djelatnosti privrednog subjekta MG Mind su trgovina na malo električnim aparatima i bijelom tehnikom i izgradnja, održavanje i zaštita puteva. U prodajnom asortimanu bijele tehnike i električnih aparata nudi proizvode proizvođača Alfa Plam Vranje, Gorenje, Končar, Samsung i dr.

U sastavu preduzeća se nalazi i poslovna jedinica MG Putevi Prnjavor koja obavlja poslove održavanja i izgradnje puteva.

### **1.1.1. Povezana društva privrednog subjekta MG Mind**

Privredni subjekt MG Mind je vlasnik 29,75% dionica privrednog subjekta Bosna trgovina a.d. Banja Luka, 68,39% dionica privrednog subjekta Šumaproduct a.d. Trebinje i 100% dionica privrednog subjekta Atom mind d.o.o. Beograd (koji posjeduje 70% dionica privrednog subjekta Želnid a.d. Beograd).

Privredni subjekt Bosna trgovina a.d. Banja Luka, Kralja Petra I Karadorđevića 97, 78000 Banja Luka djeluje na području djelatnosti trgovine na veliko i malo.

Privredni subjekt Šumaproduct a.d. Trebinje, Trg Petral br.1, 89000 Trbinje, upisan je u sudski registar Osnovnog suda u Trebinju pod brojem: Fi-56/05 od 04.04.2005. godine, broj registarskog uloška: Ru-1-1735-00.

Osnovna djelatnost privrednog subjekta Šumaproduct a.d. Trebinje je prerađivačka industrija.

Privredni subjekt Atom Mind d.o.o., Grahovska 27, 11000 Beograd, Republika Srbija je osnovan od strane privrednog subjekta MG Mind, upisan u Agenciju za privredne registre u Beogradu pod matičnim brojem: 20472286, po osnovu Rješenja broj: 136424/2008.

Osnovna djelatnost privrednog subjekta Atom Mind d.o.o. je iznajmljivanje vlastitih ili iznajmljenih nekretnina i upravljanje njima.

Privredni subjekt Želnid a.d. Beograd, Nemanjina 6, 11000 Beograd je upisan u registar Agencije za privredne registre pod matičnim brojem: 07006829, po osnovu Rješenja broj: 12397/200.

Osnovna djelatnost privrednog subjekta Želnid a.d. Beograd je izdavanje knjiga, brošura i drugih publikacija.

## 1.2. Privredni subjekt Tržnica

Privredno društvo za tržničke usluge i trgovinu Tržnica a.d. Banja Luka, Ive Lole Ribara 4, Banja Luka je upisano u sudski registar Okružnog privrednog suda u Banjoj Luci dana 5.9.2001. godine pod matičnim brojem: 1-42-00.

Osnivači privrednog subjekta Tržnica su dioničari prema spisku Centralnog registra hartija od vrijednosti a.d. Banja Luka sa osnivačkim kapitalom od 26.227.899,00KM.

U strukturi vlasnika dionica privrednog subjekta Tržnica prije provođenja predmetne koncentracije privredni subjekt MG Mind je posjedovao 24,919% dionica, privredni subjekt Damjan d.o.o. Banja Luka 17,378% dionica, dok su ostale dionice bile u vlasništvu Penzionog rezervnog fonda a.d. Banja Luka, Fonda za restituciju RS a.d. Banja Luka i određenih fizičkih lica.

Pretežne registrovane djelatnosti privrednog subjekta Tržnica su pružanje usluga tržnica i pijaca na veliko i malo i trgovina mješovitom robom na veliko i malo, ugostiteljske usluge i transport za vlastite potrebe i potrebe drugih pravnih i fizičkih lica. Tržničke usluge obuhvataju izdavanje tezgi i poslovnih prostora za promet poljoprivrednih proizvoda, izdavanje prostora za stočnu pijacu, pijacu rabljene robe, auto pijacu i kvantašku pijacu.

Usluge tržnica i pijaca na veliko i malo pružaju se unutar Tržnog centra „Gradska tržnica“, „Nova pijaca“, Tržnica i stočna pijaca Kotor Varoš, stočna pijaca Bronzani Mejdan i Tržni centar Istočno Novo Sarajevo.

### 1.2.1. Povezana društva privrednog subjekta Tržnica

Privredni subjekt Tržnica je vlasnik privrednog subjekta PSC TAM a.d. Banja Luka sa 83,33% dionica.

Privredni subjekt PSC TAM a.d. Banja Luka, Ulica Branka Popovića br. 312, 78000 Banja Luka je upisan u sudski registar u Osnovnom sudu Banja Luka u registarskom ulošku broj: 1-278-00, a na osnovu rješenja broj: U/I1568/2002 od 4.9.2001. godine.

Osnovna djelatnost privrednog subjekta PSC TAM a.d. Banja Luka je održavanje i popravka motornih vozila.

## 2. Obaveza prijave koncentracije

Obaveza prijave koncentracije privrednih subjekata, u smislu člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom nivou iznose 100.000.000,00 KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekata učesnika koncentracije ostvarena prodajom roba i/ili usluga na tržištu Bosne i Hercegovine iznosi najmanje 8.000.000,00 KM, ili ako je zajednički tržišni udio učesnika koncentracije na relevantnom tržištu veći od 40,0%.

Ukupan godišnji prihod privrednih subjekata učesnika predmetne koncentracije, na dan 31. decembra 2010. godine, iznosio je:

Tabela 1.

	<b>MG Mind</b>	<b>Tržnica</b>
	<b>KM</b>	<b>KM</b>
<b>Svijet</b>	(..)* <sup>1</sup>	-
<b>BiH</b>	(..)*	(..)*

Izvor: podaci iz Prijave i relevantne dokumentacije

<sup>1</sup>(..)\* - Podaci predstavljaju poslovnu tajnu

Godišnji prihod učesnika koncentracije predstavlja ukupan prihod (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekta ("Službeni glasnik BiH", br. 34/10).

Konkurencijsko vijeće je utvrdilo da su privredni subjekti učesnici koncentracije u 2010. godini ostvarili ukupan prihod koji podliježe obavezi prijave koncentracije, u skladu sa članom 14. stav (1) tačka b) Zakona.

### **3. Pravni okvir ocjene koncentracije**

Konkurencijsko vijeće je u provođenju postupka ocjene predmetne koncentracije primijenilo odredbe Zakona, Odluke o načinu podnošenja prijave i kriterijima za ocjenu koncentracija privrednih subjekta, Odluke o utvrđivanju relevantnog tržišta ("Službeni glasnik BiH", br. 18/06 i 34/10) i Zakona o upravnom postupku ("Službeni glasnik BiH", br. 29/02, 12/04, 88/07 i 93/09).

### **4. Pravni osnov i oblik koncentracije**

Privredni subjekt MG Mind je dana 15.3.2011. godine objavio Obavještenje o sticanju dionica privrednog subjekta Tržnica na osnovu koje je nastala obaveza objavljivanja ponude za preuzimanje svih dionica sa pravom glasa, nakon čega je dana 13.4.2011. godine objavio Javnu ponudu za preuzimanje dionica privrednog subjekta Tržnica. Javna ponuda je istekla dana 13.5.2011 godine prilikom koje nije bilo izmjena u odnosu na početnu ponudu za preuzimanje. Privredni subjekt MG Mind je tom prilikom preuzeo 3.493.973 dionice. Nakon završetka ponude privredni subjekt MG Mind je raspolagao sa 23.255.508 dionica sa pravom glasa privrednog subjekta Tržnica, odnosno sa 88,6671% ukupnog broja emitovanih dionica sa pravom glasa.

Pravni oblik koncentracije u skladu sa članom 12. stav (1) tačka b) pod 1) Zakona, predstavlja sticanje kontrole jednog privrednog subjekta nad više drugih privrednih subjekta, odnosno dijelova drugog privrednog subjekta i to sticanjem i kupovinom većine dionica.

### **6. Relevantno tržište**

Relevantno tržište, u smislu člana 3. Zakona, te člana 4. i 5. Odluke o utvrđivanju relevantnog tržišta, čini tržište određenih proizvoda i/ili usluga koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Relevantno tržište prema predmetu poslovanja učesnika u koncentraciji je tržište pružanja usluga tržnica i pijaca na veliko i malo, dok je relevantno tržište prema teritoriji na kojoj posluju učesnici koncentracije teritorija Republike Srpske.

Na osnovu navedenog kao relevantno tržište predmetne koncentracije utvrđeno je tržište pružanja usluga tržnica i pijaca na veliko i malo u Republici Srpskoj.

## **7. Ocjena predmetne koncentracije**

Konkurencijsko vijeće je analizom relevantnih podataka ocijenilo da će, u smislu člana 17. Zakona, predmetna koncentracija imati određene dugoročne pozitivne ekonomske efekte na pružanje usluga tržnica i pijaca na veliko i malo na području Republike Srpske unaprijeđenjem kvaliteta istih kroz sticanje novih i povećanja iskorištenosti postojećih resursa.

Konkurencijsko vijeće je ocijenilo dopuštenom predmetnu koncentraciju, te u smislu člana 18. stav (2) tačka a) Zakona, donijelo odluku navedenu u dispozitivu ovoga Rješenja.

## **7. Novčana kazna**

Konkurencijsko vijeće je tokom provjere prikupljenih podataka ocijenilo da je koncentracija provedena bez prethodnog rješenja Konkurencijskog vijeća, u smislu člana 18. stav (9) Zakona, kojim se potvrđuje usklađenost predmetne koncentracije iz čl. 12. i 14. Zakona.

Takođe, u toku provjere podataka Konkurencijsko vijeće je ocijenilo da predmetna koncentracija predstavlja koncentraciju u smislu člana 12. stav (1) tačka b) pod 1) Zakona, te da je obaveza prijave koncentracije u smislu člana 14. stav (1) tačka b) Zakona postojala za privredni subjekt MG Mind.

Privredni subjekt MG Mind bio je dužan podnijeti prijavu koncentracije, u smislu člana 16. Zakona, u roku od petnaest dana od dana javne ponude za preuzimanje dionica, odnosno javne objave namjere za ponudu kupovine dionica.

Konkurencijsko vijeće, u skladu sa članom 48. stav (1) pod e) Zakona, novčanom kaznom u iznosu najviše do 10 % vrijednosti ukupnog godišnjeg prihoda privrednog subjekta iz prethodne godine koja je prethodila godini u kojoj je nastupila povreda zakona, kaznit će privredni subjekt ili fizičko lice, ako provede koncentraciju bez prethodnog rješenja o koncentraciji u smislu člana 18. stav (9) ovog Zakona.

U skladu sa članom 49. stav (1) tačka b) Zakona Konkurencijsko vijeće može izreći novčanu kaznu do 1,0% od ukupnog prihoda iz prethodne godine poslovanja privrednom subjektu koji ne podnese prijavu koncentracije, u smislu člana 16. Zakona.

Također, u smislu člana 52. Zakona, Konkurencijsko vijeće je prilikom određivanja visine novčane kazne uzelo u obzir namjeru povrede Zakona. Konkurencijsko vijeće je utvrdilo da namjera nije postojala s obzirom da predmetna koncentracija ne spada u zabranjene koncentracije, te je shodno naprijed navedenom odredilo visinu novčane kazne. Pri tome, uzeta je u obzir i saradnja privrednog subjekta MG Mind tokom cijelog postupka.

Konkurencijsko vijeće je izreklo ukupnu novčanu kaznu radi kršenja člana 16. stav (1) Zakona i člana 18. stav (9) Zakona privrednom subjektu MG Mind u iznosu od 40.000,00 KM, što predstavlja oko (..)\*% ukupno ostvarenog prihoda iz 2010. godine.

U slučaju da Podnosioci prijave ne izvrše uplatu novčane kazne u utvrđenom roku Konkurencijsko vijeće će zatražiti od relevantnih tijela prinudno izvršenje iste, te obračunati zateznu kamatu za vrijeme prekoračenja roka uplate novčane kazne, u skladu sa propisima Bosne i Hercegovine.

Slijedom navedenog Konkurencijsko vijeće je odlučilo kao u tački (2) dispozitiva ovog Rješenja.

## **8. Pouka o pravnom lijeku**

Protiv ovog Rješenja nije dozvoljena žalba. Nezasadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

**Predsjednik**

**Ibrica Lakišić**